

Այսպիսի գանգատներով լի են ժամանակի յիշատակարանները, որոնցից իմանում ենք, որ սովը կոտորածը, բռնի կրօնափոխութիւնը, սրբութիւնների պղծումը, վանքերի և եկեղեցիների կողոպտումն և աւերումը, մորեխը, մահտարաժամը, հալածանքն և այլն միմեանց հետ դաշնակից էին եղել մարդկային շարութեան ամէն նրբութիւններն յերևան հանելու և մի խեղճ հարստահարուած աղք ոչնչացնելու։ Եւ այդ է պատճառը, որ Չաքարիա կաթուղիկոսի յաջողութիւնը շատ և այնքան շատ ուրախացնում և մխիթարում էր ժողովրդին։ Այս հանգամանքի մէջ ոչ պակաս աչքի է ընկնում նոյն իսկ Չաքարիայի անձնաւորութիւնը, յիշատակարանները նորան ներկայացնում են իբրև ժիր, գործունեայ, քաղաքագէտ, ժողովրդի և եկեղեցու շահերին հաւատարիմ և անձնուէր մարդ, որն, ինչպէս ասում են թերևս չափազանցութեամբ, նաև տոհմական ազնուութիւն ունի, լինելով Արծրունեաց Գագիկ թագաւորի տանից, Ջահանշահի և Բաղիշու ամիրայի մէջ ծագած գժտութեան և կռիւների ժամանակ Չաքարիա կաթուղիկոսի սիրտը չդիմացաւ, տեսնելով Բաղիշու անմեղ ժողովրդի կրած հարուածները և «դտապալումն սրբոց սեղանացն, զգերեվարելն սրբութեանց և զխափանումն փառարանութեանցն Աստուծոյ և զտարաշխարհիկ լինելն ամենայն խառնիճաղանճ ժողովրդեան՝ զգերելն և զտատանելն»։